



Dryzäände Joorgang

Fasnacht 2010

Die Gsalzene

Si schwätze immer unverstündlig und verbraite fremdi Gläng
Mir wänn se nid in unsrer Stadt – si schmegge eenter sträng
Unsri Hochkultur bedrooe sottig wiss-blaui Nomaade
Jetz hämmer Gopferglemme z' Basel scho dr zwaiti Sprüngli-Laadel

Si sinn gschpräächig, bräsentiere guet und glaide sich gäärn schygg
Drum beherrsche jetz im Bundeshuus nur Fraue d' Bolytig
Uff die Idee isch s' Angi Merkel scho e bitzli friener koo
Und hett als Vizekanzlerin d' Frau Westerwelle gnoo

S' Geothermiebrojäggt isch jetzt am Änd – wie leese mir das Ganze?
Denn die Winter sinn so yysig-kalt, do frierts aim grad an Ranze
Zem haize gitt's e Meegligkait wo sich regeneriert
Mit dr warme Luft wo unsere Guy Morin broduziert!

Wenn mir dr Keenig Guy dr Erscht im Droonsaal s' Zebbder gseen boliere
Wurde mir no schampaar gärn die Inszenierig komentiere:
«Euer Durchlaucht Keenig wird jo – bitte dien si 's nid vergässe
Jede Tschooli wo dr Keenigskueche ganz elai duet ässel!»

Dr Polanski wott uff Ziiri und isch nur bis Klote koo
D' Fans vom FCB die wärde scho z' Altstette usegnoo
Wenn mir das heere duet bi uns ai groosses Froogezaiche blybbe
Was um alles in dr Wält ka denn e Mensch nach Ziiri drybye?

D' Spiiler laufe iibre Golfblatz in dr Hand e harte Schleegel
Wenn me «Byrdie» oder «Eagle» heert, denn dänggd me grad an Veegel
Uff allne Blätz yyloche – dodrinn sinn si wiirgligg top
Eso gse isch dr Tiger Woods e Opfer vo sim Job

Unsri Misse sige hooli Nyss – dä Vorwurf isch e haarte
Denn s' Matterhorn z' erkenne kamme wiirgglig nid erwaarte
Und scho bim Bild vom Bundeshuus het aini d' Antwort grad baraad:
«Wenn I die Kuppel see, denn frai mi uf die neie Implandaad!»

Au mir Gsalzene geen gärn go schwitze, finde das dr Hit
Doch vor dr gmischte Sauna luegt uns sträng dr Baadmaischer in Schritt:
«Ich ka Eich so nid yyneloo, Ir wisset's sapperlott
Mir halte uns ganz konsegwänt ans Minarettverbot!»

S' Minarettverbot das duet uns offegstande irritiere
Als näggschts wänn gwiissi Graise denn no Kirche uusradiere
Doch s' Potential vo somme Kirchduurm kenne d' Gegner schyynbaar noni
Dä macht sich byspiilswyys ganz guet im Gsicht vom Silvio Berlusconi!

Monschtervärs

Dr Muammar al-Gaddafi
Said: «Die Schwyzer sinn scho Schlaffi
Und ire Chef, das isch kai Scherz
Isch Gartezwärg mit Name Merz!»

«Frau Calmy-Rey isch au e Hit
Hett uf em Kopf e Nachtdopf-Schnitt
Und Widmer-Schlumpf das komisch Wääse
Hett Frisur wie Kuchi-Bääse»

«Doch 's gitt au Schwyzer – das isch scheen
Wo - wie ich - gärn guet usseen
Dr Hakan Yakin dä schlau' Kopf
Schmiird sich my Tamoil in si Zopf»

«Sven Epiney dä haissi Showmaa
Draid gärn e rosaroot Tanga
Wott ich an Tunteball als Diva
Leen ich mir Glaider vom Mike Shiva!»

Mir wänn jetzt nimme lenger spotte
Dr Gaddafi isch e Flotte
Dä härzig Dikatoregloon
Isch unsre Lieblingswieschtesoon

Duet s' Gsundheitswääse unterstizte
Loot sich lifte, Botox spritze
Bald seet är us – die armi Seel
Wie ains vo sine Rennkameel

Er läbbt als eedle Maa vo Wält
Immene Beduinezält
Und si Soon dr Hannibal
Schmeggt e bitz noch Gaissestall

Au d' Schwyz uffdaile und zerlege
Duet uns irgendwie errege
Dä Aasatz dien mir Basler loobe
Schängge d' Ziircher grad de Schwoobe!

Gadaffi duet scho lang regiere
Sott das dr Bundesroot kopiere
Miesst me dr Merz – dä wurd nid knaiffe
Als Mumie us em Byyroot schlaiffe!

Die Situation kennt eskaliere
Wie sotti d' Schwyz druff reagiere?
'S git nur ai Wääg us dääre Not
Die Gsalzene in Bundesroot!

www.diegsalzene.ch

Wird au du e Schnitzelbänggler! Schryyb aifach e E-Mail an info_bsg@bsg-online.ch